



Kolumna Valentina Inzka, visokog predstavnika i specijalnog predstavnika Evropske unije u BiH: “Referendum je opasna politička avantura”

Prije dvije godine preuzeo sam dužnosti visokog predstavnika i specijalnog predstavnika EU, uz apsolutnu opredijeljenost da pomognem četiri miliona ljudi u ovoj zemlji da ostave prošlost iza sebe i počnu uživati u istom prosperitetu i sigurnosti kao i drugi narodi u ostatku Evrope.

Danas se ta opredijeljenost nije ni najmanje promijenila. Nažalost, ista opredijeljenost nije očita kod pojedinih domaćih političara.

Rezultati takve situacije su potpuno jasni i očigledni svima.

Širom zemlje nije došlo do porasta životnog standarda. Došlo je do njegovog pada.

Stopa nezaposlenosti nije opala. Naprotiv, porasla je.

Napredak ka Evropskoj uniji je potpuno zaustavljen.

Uz ovakve okolnosti neuspjeha, političari u RS organizuju referendum. Sam po sebi referendum nije sporan – već je sporna činjenica da se radi o entitetskom referendumu o državnoj nadležnosti.

Nijedan entitet nema ustavni mandat da se bavi državnom institucijom, a to je i Sud BiH. To nikada nije bilo entitetsko pitanje. To je uvijek bilo državno pitanje. U institucionalno složenoj zemlji kakva je BiH, svaki nivo vlasti mora poštovati svoje nadležnosti i ne smije ugrožavati druge.

Političari u RS znaju ovo i trebaju znati da podrivanje Mirovnog sporazuma predstavlja opasnu političku avanturu koja može imati nepredvidive posljedice.

Ljudi u svakom dijelu ove zemlje su patili zbog brutalnosti ratnih zločinaca. Ljudi u svakom dijelu ove zemlje i dalje pate zbog organizovanog kriminala i korupcije.

Siguran sam da građani BiH žele jače sudove, a ne slabije. Oni žele da svi koji su učestvovali u ratnim zločinima, svi koji su učestvovali u organizovanom kriminalu, svi koji su primali mito ili koristili politički položaj za nagomilavanje ličnog bogatstva budu procesuirani pred sudovima i kažnjeni.

Ako postoje pitanja o državnom pravosuđu, o njima treba razgovarati unutar državnog parlamenta. Ove institucije postoje kako bi se koristile. Srbi su glasali za taj zakon na državnom nivou i oni mogu inicirati poboljšanja, opet na državnom nivou. To bi moglo biti dobrodošlo.

Kao visoki predstavnik, odgovoran sam za poštivanje Dejtonskog mirovnog sporazuma, kako građani ove zemlje nikada više ne bi morali patiti zbog kratkovidnosti ili igara moći koju igra mala grupa političara. Ja i međunarodna zajednica ćemo ispuniti tu odgovornost.